

Abialdian, askatasunaren ibilaldia



Milaka pertsonak egin zion ongi etorria Askatasunaren Ibilaldiari, jai giroa eta aldarrikapen politikoa uztartuz. Irudian sorgin dantzariak XOUSE SIMAL

Askatasunaren bidean «beste urrats bat» egin dute milaka lagunek Gernikan

Bide horretan bihar Donostian izango den manifestaziora joateko deia egin dute

Askatasunaren Ibilaldia atzo amaitu zen Gernikan, duela 20 urteko martxa hasi zen herri berean. Alabaina, Abialdian plataformaren izenean Imanol Agirrek azpimarratu zuenez, atzokoa ez zen amaiera izan, «beste urrats bat baino ez, askatasunaren ibilaldiak ez baitu mugarik». Bukaerako festan milaka pertsona elkartu ziren, primerako jai giroan.

Iñaki Uriarte / Gernika

GOIZEKO 11:30etan ateratu ziren ibiltariak Lekeitiotik. Goiz partean egunak argitasun handirik ez bazuen ere, gogotsu osatu zituzten Arteagarainoko kilometroak. Han bazkaria egin zuten. Bazkalostean, Gernikara jo zuten. Renteria auzoko zubian, sarreretan jada, zantantzarrak zain zituzten, ongi etorria merezi bezala egiteko. Herrian milaka pertsona elkartu ziren, adin eta jatorri askotakoak. Ikurrinak, berriz, ia buruak beste, sekulako festa giroan.

Sorgin-dantza, Akerren agerpena eta kalejira, dena bat izan zen Gernikako Foruen pasealekuko harreraren. Aurretik antolakuntzaren furgoneta, atzetik lekukoaren ikurrin handia, eta ondoren 100 bat sorgin dantzari zihozten. Herrian hainbat ikus-kizun izan zen dantzariaren gain, hala nola tximinoak kalejiran. Atzetik, gurdi batean, herriz herri ibilaldian lekua izan duten hainbat arlo: gazteria, intsumisioa, emakumea, ekologia, euskara eta langileak, altxor kutxa batez ordezkaturik. Martxa ixten, berriz, Juan Carlos Hernando Albaceteko kartzelan urkatutik agertu zen presoaren eta Ugao omendu duten Andres Barrondoren bi argazki handi eta euskal preso guztien argazkiekin beste pankarta handi bat.

Monzonen hitzak gogoan • Arratsaldeko 19:30ak pasatxoan, Santa Luziako zelaira edo Lurgorriko landara jo zuten ibiltari eta partaide guztiak. Bidean independentziaren eta presoan Euskal Herriratzaren aldeko oihuak izan ziren nagusi. Zelaian, Imanol Agirrek duela 20 urte Telesforo Monzonek esandako hitzekin egin zien agurra: «Monzonek esan zuen askatasuna ez zela lortuko gizarte mugimendu indartsuaren lan eta bultzada barik, eta horregatik ibili gara euskal bideetan barna, horregatik marxistek urratu dituzte oinetakoak». Era berean, Euskal Herriaren geroa erabakitzeko eskubidea ukatu izana salatu zuen Agirrek. «Baina guk, Euskal Herria maite dugulako, ez dugu amore emango».

Presoak ere gogoan izan zituzten, eta duela 20 urte «ustezko amnistia» indarrean jarri ondoren, kartzelak berriro bete direla adierazi zuten. «Nork esan deza ke askatasuna dagoela herri honetan ia 600 militante giltzapean bortizki zapaltzen dituzten bitartean? Heriotza haizea dakarte Espainiak eta Frantziak», adierazi zuen.

Rosario Torre Altonagak, espetxean 18 urte daramatzan Medius preso politikoa arrebak, horixe bera azpimarratu zuen. Torre Altonagak, halaber, Espainiako Gobernuak ezarritako «sakabanaketa politika itsua»

gaitzetsi zuen: politika horren bidez presoan damutzea eta deuseztatzea nahi dute. Hori da etengabe demokrazia eta bakea hitz potoloak darabilzkiten horien ardatza eta helburua. Horregatik, Askatasunaren Ibilaldia, «Euskal Herriko borrokariaren askatasuna aldarrikatzeko martxa ere izan da», Torre Altonagaren hitzetan.

Ondoren marxisten izenean ordezkari batek esker oneko hitzak izan zituen: «Gure aldetik eskerrak ematea besterik ez, bide honetan lagundu diguten guztiak, eurak gabe ezinezkoa izango bailitzateke gu hemen egotea. Aurretik ere askatasunaren bidean jarraituko dugu, zoritxarrez ez baita amaitu».

Ekitaldi politikoa amaitzeko Xabier Amurizak azpimarratu zuenez, «20 urteren ondoren, demokraziak frogatu du Euskal Herriarentzat auzia ez zela hainbeste frankismoa, Espainiako Estatua eta alderdi espainolak

baizik. Alderdi abertzaleak ere, duela 20 urte, Espainiaren kolaboratzaile hain handiak izango zirenik ez genuen sinetsiko».

Hori esanik, Amurizak nabarmendu zuen orduko helburuek gaur ere badiraute. «Euskal Herriaren askatasunean aurre-pauso sinesgarria eman dugula baieztatzeko, ezinbestekoa dugu autodeterminazio eskubidea. Eskubide horrek oraingo aro gogorra eta guztientzat sufriarazlea gaindituko luke». Amurizaren hitzen ondoren, abesbatzak, jendearen laguntzarekin, *Jaiki Adi* abestu zuen.

Imanol Agirreraren agurreko hitzak ongi etorrikoen oso antzekoak izan ziren: «Hau ez da amaiera, amaierarik gabeko bidea baitugu aurrean». Segidan, bihar Donostian HBk deituta egingo den manifestaziora joateko eskatu zuten antolatzaileek.

Akelarreak eta kontzertuak berandura arte luzatu zuten jaia. X

■ Mexikokok Oscar Cadenas errefuxiatuaren eskubideak bermatuko ditu

Mexikoko Gobernuak Amnesty International (AI) erakundeari adierazi dio Oscar Cadenas Lorente euskal errefuxiatu politikoa Mexikoko legeen bermea izango duela egingo zaion estradizio epaiketari. AI-k eskutitz bat bidali zion Mexikoko Gobernuari Oscar Cadenasen egoeraz kezkatuta. Mexikoko Gobernuak, Carlos Pujalte Kanpo Harremanetarako idazkariaren bitartez, nazioarteko erakundeari erantzun dio «estradiario eskaera orok» baduela anparoko epaiketa baten bidez aurka egiteko legeko errekurtsua. X

■ Aznar eta PPko zuzendaritza Bilbon bilduko dira astelehenean

Astelehenean Bilbon egingo duten bileran Euskal Herriko egoera aztertuko dute Jose Maria Aznar Espainiako lehendakariak eta PPko Zuzendaritza Batzorde Nazionalak. Besteak beste, Carlos Iturgaitzek eginiko txosten bat aztertuko da bileran. Bertan, ETaren azken atentatuaren ondoren PPk Euskal Herrian duen egoerari buruzko datuak agertzen dira. X

■ Ertzaintzan %10 kide ez daude libre Arkauten egin beharreko ikastaroengatik

EUSKO Jaurilaritzako Barne Sailak eman dituen datuen arabera, Ertzaintzak dituen 7.000 kideetatik 600 ez daude libre eguneroko lanetarako Arkauten akademian hainbat ikastaro egiten dituztelako. Ikastaro horien artean daude euskalduntzeko ikastaroak, eta ildo horretatik Atutxak Legebiltzarrerara bi erantzun bidali ditu, ertzainen euskalduntzeak eraginkortasunean duen eragina azaltzeko. Atutxak aditzera eman duenez, beste promozio bat irtengo da, sortzen diren hutsuneak betetzeko. X

Kazetari lanpostua ARKOn

ARKOk ARRASATE PRESSen eta ATBn egun osoz lan egingo duen kazetari bat behar du. Urtebeteko lan kontratua eskaintzen da, luzagarria.

Interesatuak kurrikuluma bidali uztaila bukatu baino lehen honako helbide honetara:

ARKO, Otalora Lizentziatua 31 - 20.500 Arrasate.

Hautatze frogak irailaren lehen astean egingo dira.

Informazio zabalagoa behar izanez gero, deitu (943) 77 05 65 telefono zenbakira.

ARKO
Arrasate Komunikabideak